

fans comme un triangle, qui nous fust à bon augure & une memoire de la tres-saincte Trinité, un seul Dieu en trois personne\*, Peres, Fils, & S. Esprit, également bons, sages & puissans.

Or d'autant que i'estois fort aymé de Oonchiarey mon Sauvage, de la pluspart de ses parens & de tous ceux de la bourgade, ie ne sçauois comment l'aduer-tir de nostre dessein, ny quelle excuse prendre pour luy faire agreer ma sortie, nous trouuames en fin moyen de luy persuader que i'auois quelque affaire d'importance à communiquer à nostre frere Ioseph, & qu'allant vers luy il falloit necessairement que j'y portasse tout ce que i'auois, qui estoit autant à luy comme à moy mesme, afin de prendre chacun ce qui luy appartenoit, le bon ieune homme se contenta de ceste raison, sous esperance de nous reuoir bien tost, & ainsi satisfaict, nous primes congé de luy & partimes pour le village du Pere Ioseph.

Nous nous seruimes d'un Sauvage pour guide, & pour porter nos paquets moyennant quelque petite courtoisie que nous luy donnames, mais le plaisir fut d'un François nommé la Criette, seruiteur du sieur de Champlain, lequel ayant apperceu dans le bois à vingt pas de nous, un arbre tout couuert de tourtelles, & les voulans tirer, il tourna tant de fois à l'entour de l'arbre qu'il effara les oyseaux, & luy  
218 mesme s'égara, de sorte qu'il nous fallut faire || courir nostre Sauvage après luy, qui s'enfuyoit comme un perdu à trauers les bois, pensant nous suiure dans un sentier contraire, & le ramener au lieu mesme où il nous auoit laissé assis, tellement qu'il eut bien de